

欽定平定教匪紀略

欽定平定教匪紀畧卷八

十月初一日

午甲

高杞奏言

臣於二十五日擒獲

賊探訊知賊衆因二十二日打仗喫虧欲於二

十六日前來報讐共有八千五百人

臣駐營濬

縣城外浮邱山上次早瞭望果見賊匪甚衆分

作三股一股似撲大營二股分爲左右兩路查

山下係民居空房有山上大路一條爲登山必

由之道當卽暗設礮位以逸待勞賊匪距營四五里遲疑良久見我營絕無響動直至山下蜂

擁前來臣親率撫標衆將張拱辰首先應敵色

克通阿叅將陳弼暨備弁兵丁各站牆接應俟

賊匪近前施放鎗箭前賊中鎗倒地後賊復蟻

附而來如此數次始行轉回藏匿山下空房我

兵勇氣百倍追殺下山殲斃六七百人維時左

右兩股之賊分途繼進我兵復加痛剿殺死二三百人生擒七十餘人奪獲馬騾鎗箭刀矛甚多餘匪四散奔竄時已昏暮未便遠追當卽提犯嚴訊內有穿白衣四人訊係小頭目一名王振林一名劉問禮均山東定陶縣人一名張惠一名富吉忠均滑縣人其餘白布裹頭俱是散賊伊等僉供此次糾集八千餘人分作三股

大股是來打仗兩小股一襲大營一搶糧臺不
料被官兵打敗所有八千餘人內有山東曹縣
定陶等處三千餘人係頭目李第七邀來的至
李第七在前督陣不知下落等語當卽概行正
法又隨營糧臺設於山左城隍廟同時有賊百
餘人潛赴放火經試用知縣梁直方試用吏目
符芬帶領兵役閉門固守賊人爬牆進門梁直

方等督兵殺死數人用礮轟擊始散此次接仗
不特將備兵丁分外奮勇卽隨營文職及夫役
人等同心協力賊勢大形挫衄現在偵探逆蹤
相機辦理至此次打仗兵丁間有受傷另容查
明辦理其追殺賊匪護守糧臺官兵實屬加倍
奮勇未敢壅於上
聞謹擇其尤爲出力者另繕清單恭呈

御覽

是日高杞又奏言現在探得賊匪大股占據滑城直東二省被剿竄匪均集於此其餘另有兩大股分屯於濬滑之道口桃源二處而濬滑二縣附近村莊被脅從賊又難悉數臣駐營濬縣城外距滑城二十五里道口十八里桃源十五里官軍若徑剿滑城道口桃源二股即可襲大

營而攻濬縣若剿道口桃源必須同時並舉又
因兵單未能分剿近日拏獲賊匪訊知滑城之
賊從未前來濬縣又據蘭陽封邱二縣稟報間
有賊匪焚掠村莊黃河南岸亦有勾連竊發之
機深爲可慮查溫承惠現已帶兵行抵開州若
由豫省內黃前來濬縣計程祇百餘里臣俟與
之合營可得兵六千人彼時分兵先剿道口桃

源二股該匪必不肯輕棄滑城前來救援道口
桃源之賊被剿後自必奔竄滑城然後一面分
兵搜剿各村餘匪而以大兵直搗滑城庶可聚
而殲旃不致逃逸臣已札會溫承惠並遣濬縣
把總王起祿馳往導引訂其作速帶兵來豫會
師進剿以期一舉蕩平再本月二十六日接據
蘭陽縣知縣童泰初稟稱該縣北岸村莊間有

匪徒焚掠近有難民男婦二千餘名逃至渡口
該縣量爲撫卹渡至南岸等情查賊匪行蹤詭
秘該縣北岸村莊既被焚掠此項難民二千餘
人恐有匪徒混跡在內蘭陽至省僅隔一程倘
致勾結滋事所聞匪細該縣不察虛實率行濟
渡現已嚴行申飭並飛檄藩臬兩司通飭沿河
各屬此後卽實係難民亦未便擅渡南岸以杜

竄逸

同日徐州鎮總兵沈洪奏言

臣

於九月十四日

接據營縣稟報探聞河南滑縣山東曹縣定陶

均有匪徒滋事

臣

恐匪徒潛竄入境交界地方

亟宜戒備卽挑帶本標官兵四百名派令中營

守備沈士魁押解軍火器械隨

臣

由豐礶一帶

前往相機防堵茲於十八日途次劉家集接奉

諭旨令挑帶健勇兵丁一千名由南向北赴山東曹
州一帶堵剿仰見我

皇上握算幾先曷勝欽服臣遵卽飛調健勇兵六百

名補足一千名派令城守營都司程時霖蕭營

都司張佑溪分領由礪山豐縣二路赴曹單一

帶交界會合迎截臣卽將親帶官兵四百名暫

紮劉家集防堵查江南山東接壤之處皆平原

曠野臣相度地勢應於豐縣之劉家集首羨集渠家閣黃家店設卡四處碭山縣之楊家集馬良集青花觀設卡三處沛縣之孟家馬頭胡陵城設卡二處以上九處俱係要隘地方爲山東入江境要道上下相距不過二三十里聲勢聯絡現於每卡撥兵六七十名至百餘名不等連日探得賊匪尙在潛匿定陶荷澤曹縣城武一

帶滋擾衆散出沒無定山東撫臣兗州鎮臣皆
來曹郡尅日會剿一經重兵追剿尤當防其南
竄臣惟有上下巡防嚴密堵截現在督臣百齡
調撥各標官兵二千名前來徐州防守接應客
當相機進剿以防奔竄均奏入

上諭內閣曰高杞奏官兵在濬縣城外浮邱山上駐
紮賊衆因二十二日被官兵擊敗之後心圖報復

輒於二十六日聚衆八千五百人潛分三股蜂擁
撲營經高杞督同參將張拱辰等首先迎敵色克
通阿叅將陳弼帶兵接應鎗箭施發前賊倒地後
賊復來我兵勇氣百倍將賊匪殲斃六七百人其
左右兩股之賊分途繼進亦經剿殺二三百人生
擒七十餘人餘匪紛紛潰散又同時有賊百餘人
攻劫糧臺經糧員試用知縣梁直方更目符芬帶

領兵役奮勇殺追所辦俱好此誠

天佑國家事機順利賊匪諒可尅日掃除實深感謝高
祀督率有方前已有旨交部議敘俟續有勝仗再
行施恩叅將張拱辰超衆出力前經交部優敘該
員曾賞戴花翎著勳恩賞給健勇巴圖魯名號其
單內保奏實在出力各員干總加守備銜鄧殿魁
著施恩以應陞之缺卽行陞用把總李錦著施恩

先加于總銜以應陞之缺卽行陞用兵丁楊鳳得
李文錦陸文安萬清著施恩俱以外委用試用知
縣梁直方著施恩以知縣卽用仍加知州銜試用
吏目符芬著以吏目卽用仍加縣丞銜以示鼓勵
上又諭內閣曰據高杞奏蘭陽縣知縣童泰初稟報
該縣北岸村莊有匪徒焚掠難民男婦二千餘名
逃至渡口該縣全行渡至南岸恐有匪徒混迹在

內嚴行申飭等語難民被賊奔逃如果查驗確實
自應撫卹今黃河北岸正在剿賊緊要之時童泰
初不辨虛實率將二千餘人渡赴南岸實屬冒昧
童泰初著革職枷號河干並著高杞通飭瀕河州
縣實力盤查勿稍疎解

上命軍機大臣傳諭溫承惠高杞同興曰高杞奏在
濬縣城外浮邱山竊剿賊衆一摺已降旨分別施

恩矣本日又接高杞續奏酌籌剿捕機宜一摺現
在賊匪以滑縣爲巢穴另於附近之道口桃源二
處屯聚兩大股官軍若先剿滑縣之賊恐被牽制
自應先剿道口桃源兩處賊匪如奔投滑城正可
聚而殲旃現在溫承惠帶兵已至開州距滑縣甚
近著卽與高杞彼此約會將道口桃源之賊分投
進攻並緊防滑城救援之路伊等進剿機宜朕亦

不爲遙制惟當趁此賊匪敗衄之時督率直豫兩省官兵併力迅速進攻將賊匪兩面夾擊何處兵單卽分撥將弁協助由西北向東南逼剿使賊首尾受敵勿再擾及完善之地同興亦卽督率弁兵奮勇截剿同心合力三面兜圍自能一戰成功也

再高杞摺內奏稱據蘭陽封邱二縣稟報該縣村莊間有賊匪焚掠現在黃河南岸亦有勾連竊發

之機衛輝黃河南岸係歸德開封二府如有蠢動
關係甚鉅溫承惠高杞均在河北勢難兼顧如一
有警報溫承惠等卽飛速知會百齡胡克家就近
派兵前來剿捕不必拘泥先行請旨一面飛咨一
面奏聞可也現在未獲各逆李文成劉幘明徐安
幘于克敬王學禮馮克善六犯均係傳教渠魁此
內李文成徐安幘二犯尤爲最要尙有突入禁門

滋事之逆犯祝現劉第五二犯亦係林清手下大
徒弟尙無切實下落著溫承惠高杞同興一體留
心密行查緝一經拏獲迅速奏聞審明盡法處治
上又命軍機大臣傳諭署直隸總督章煦曰現在未
獲各逆李文成劉帽明徐安帽于克敬王學禮馮
克善六犯俱係震卦教內大頭目又前次突入禁
門滋事逆犯內有祝現劉第五二犯據獲犯供稱

係林清手下大徒弟現在查拏尙無切實下落該犯俱係著名賊目必應嚴拏盡法處治此內李文成徐安帽自係在滑縣長垣起事匪徒股內或潛赴直境勾結亦未可定其祝現劉第五二犯於滋事後或逃往直豫一帶投歸夥黨著該署督飭知地方文武員弁嚴密查拏勿任漏網再現在派往軍營之火器健銳營官兵一千名卽日起程及續

調之吉林黑龍江兵二千名均由直隸行走已諭
知帶兵大員沿途嚴明約束著該署督先期於經
過各州縣村莊遍行出示曉諭以現在直隸長垣
河南滑縣一帶匪徒滋事所派大兵直抵軍營剿
捕逆匪以安良善所過之地秋毫無犯該民人等
不得妄生疑懼自形驚擾該署督一面明白曉示
俾各安堵如常一面飭令各州縣將應備車馬趕

緊籌辦俟官兵到站迅速傳送出境勿稍稽緩

上又命軍機大臣傳諭沈洪曰昨有旨派沈洪帶兵

一千名赴同興軍營幫同進剿本日據該鎮奏於

江境要道設卡九處聲勢聯絡相通此時百齡已

親赴徐州其江南邊界自能相機防禦現據高杞

奏河南屢獲勝仗殲斃賊匪數千名溫承惠已馳

赴豫省邊界併力會剿恐賊匪被直豫兩省官兵

剿殺亡命向東南奔突著沈洪隨時差探如有賊匪竄近卽帶兵分頭截擊其沿河一帶並著留心巡查勿使賊蹤闖入爲要

上又命軍機大臣傳諭河東河道總督戴均元湖南巡撫廣厚曰睢汎漫口工程自應尅期堵合但興舉大工必須鳩集人夫目下河北賊匪滋事地方距工次不遠難保無竄逸零匪溷迹其中現在該

處購料維艱工次料垛最關緊要該匪狡計多端
設潛往焚燬或乘勢擄掠所關匪細著戴均元抵
任後與廣厚會同籌酌現在先將漫口裹頭做好
從容購料工次人夫無須太多擇附近村莊樸實
可信者量爲雇募不可大意務須萬分留意勿墮
賊計爲要

同日章煦奏言臣於二十八二十九兩日接據

大名道府東明縣來稟內稱二十二日東明城外有賊千餘人騎馬六十餘匹大車二十餘輛由李家營段家莊一帶行走均未滋事傷人有縣役改裝鄉民混入夥內探知賊匪甚衆俱名爲當家用坎卦旗號姓劉姓朱姓呂姓張不一又二十二日賊匪在滑縣長垣交界地方經大名協副將率兵追捕賊匪棄械奔逸又長垣迤

東與東明相距不遠之李化宇莊聚有千餘人
焚搶村莊又探得長垣之賊有與匪匪交通之
信看來賊匪尙在鴻張現在溫承惠馬瑜均至
開州今又奉

旨派德寧阿蘇青阿等帶領黑龍江吉林官兵二千
名前赴軍營協剿賊匪皆在平原曠野之地得
此馬隊圍攻較爲得力臣已轉飭沿途州縣妥

爲預備奏入報

聞

十月初二日未那彥成奏言竊臣於本月二十

四日辰刻欽奉

諭旨現在直隸長垣山東曹縣河南滑縣等處有賊匪滋事著卽馳驛來京候旨簡用等因臣遵卽趕緊料理定於二十六日自甘起程當經選帶涼

州鎮總兵馬元西寧鎮總兵特依順保及勇敢
得力將備千把共一百員名陸續前進至臣平

日訓練督標精兵二千名茲擇其精壯可靠者

五百名又挑選河州鎮得力兵五百名謹一面

奏

聞一面飭令趕緊起程以資剿辦至陝省南山今年

雨水過多地方雖極寧謐究不放心臣本擬借

巡閱爲名前赴西安駐劄彈壓今董教增旣署
督篆朱勲署理巡撫查朱勲熟悉情形平素最
爲留心仰懇

皇上特降

恩諭將一切稽查撫輯事宜責成朱勲經理似爲有
益再臣正在具摺覆奏間本日未刻復接奉十

七日

諭旨著那彥成卽由陝西取道探明溫承惠現在何處徑赴軍營接受

欽差大臣關防等因臣跪讀之下不勝感悚卽於日

內星夜兼程由陝取道徑赴軍營兼程趨出潼

關卽由孟津渡河赴衛輝府探迎溫承惠接印

任事再該處係平原曠野打仗得力全在馬隊

惟西安滿兵臣前於巡閱時留心察看精壯勇

健者較少不能多派楊遇春近年訓練提標馬
隊兵丁鎗箭較嫻前楊遇春起身時先經挑選
三百名預備今再加挑選可得二百名合計可
得五百名若帶往軍營必能得力又楊遇春起
身時密行挑備固原精兵一千均未敢冒昧帶

往懇臣代

奏臣謹一而奏

聞一面卽派令畧陽營遊擊楊連仲鞏昌營遊擊丁永安帶領此項兵丁迅速起程前往協剿並求皇上恩施賞派巴圖魯侍衛一二百員卽速來營會剿更爲得力

同日同興奏言臣節次所調官兵現在陸續到

曹州府城者已有一千二百餘名若必待大集

兵力再行剿辦恐賊勢更張臣與鎮臣陳廣寧

運司劉清詳慎籌畫必須三路兜剿方可得手
隨先期派泰安營守備劉大用帶兵二百名前
赴鉅野又派臨清營都司周添章帶兵一百名
前赴曹縣均以協防爲名聽候調遣查曹州距
定陶四十里中有地名髦山賊探潛伏在彼其
附近定陶縣城或數里或十餘里俱有賊匪盤
踞村莊當於九月二十七日辰時揀派滿漢官

兵五百名飭令萊州營叅將馬建紀濟南城守
營守備劉興隆並隨營千把外委等帶領前往
直趨髡山惟時運司劉清力請從戎極爲勇往
臣飭令會同馬建紀一同帶兵剿辦午刻兵抵
髡山拏獲遊奕賊匪數人殺斃三人餘匪數十
人逃去該處樹木叢雜未敢輕進當在髡山劄
營畧爲停駐一面偵探東南兩路均有賊匪屯

聚劉清馬建紀等立卽分兵迎頭截剿東路賊匪先出抗迎劉清馬建紀等將步隊分列各用長鎗迎扎繼以馬隊衝突將士奮勇爭先銳氣百倍弓箭攢射賊匪向東大潰官兵奮力追剿生擒逆匪三十餘人殲斃一百餘人正在掩捕之際南路賊匪千餘人亦放鎗呐喊前來劉清馬建紀等督兵迎剿又殺死百餘名生擒四十

餘人收獲騾馬器械甚多惟時守備劉大用帶
兵由鉅野西來正遇東路擊敗之賊迎頭截殺
殲斃在前賊匪多人生擒二十四人餘匪紛紛
竄入賈家樓佔據該守備率領兵丁立將樓房
燒燬燒斃四五十名所有零星匪衆現在竄往
韓家大廟現在官兵劄營旁山分差兵役探蹤
往剿此次計共殲斃賊匪三百餘人生擒八十

餘人官兵並未傷損一人實堪上慰

宸屢查韓家大廟距定陶八里距曹縣三十餘里現

在徐州鎮總兵沈洪帶兵駐劄劉家集距曹縣

甚近臣已知會該鎮卽移駐曹縣兜迎堵剿更

爲得力所有此次出力官兵俟詳查實在功績

再行具

奏再附近曹定各州縣旬日以來先後稟報擎獲

逆匪共計二百一十一人其中有自認小頭目者三十餘人經臣飛飭該州縣審明但係隨同抗拒官兵搶掠居民者卽予駢誅不稍寬貸

同日河南巡撫方受疇奏言查歸德府屬之商邱縣與曹縣接壤虞城縣亦與曹單連界東西綿亘二百餘里先經歸德府知府謝學崇與歸德營參將得志籌議於存城兵內分派劉家口

及虞單交界之許家口各一百名駐劄防守郡
城存兵僅二百餘名當經率同商邱縣知縣錢

熙雇募鄉勇一千名並飭虞城縣知縣黃堂雇

募鄉勇四百名協同堵禦臣抵歸德後親自登

城鼓勵兵勇飭令該府又添募鄉勇四百名分

撥四門之外於通衢高曠處所晝夜巡查聯絡

內外聲氣並飭令文武晝夜巡防務臻嚴密又

劉家口地方經該商賈自行團練鄉勇一千名

防範緣該二縣地方與東境曹單兩縣緊接本

有大河之險可恃現在睢州漫口下游河身乾

涸無險可扼而劉家口爲曹縣東南大路尤係

豫省與皖江三省連界南通亳州東南通蕭陽

地方尤爲緊要現在賊匪屯聚曹縣西北扈家

集約有二千餘人此外股數分歧四處焚掠雖

經總河派兵二百名並知會護撫飭令陳州營
派兵防護尙未到齊亟須迅速籌備臣昨取道

徐州見該處經督臣百齡調派督標河標等兵

在彼防堵聲勢壯盛在百齡熟諳機宜知徐州

各屬惟碭山與豫省虞城均係貼近曹單自必

派兵至碭山邊界防守臣思防兵駐紮全在地

勢扼要令江南防兵與其駐紮碭山虞城交界

處所莫若挪前數十里移至虞城及劉家口一
帶邊界駐劄既爲碭山屏障又將三省連界之
處扼住庶可無慮該匪竄入東南現已飛咨百
齡及徐州鎮沈洪酌量辦理

同日章煦奏言查此次兵差應付浩繁節次派
調車馬等項爲數甚多營馬本不足額現在騎
往軍營及經軍營調赴者不少兼之各本境亦

須防禦周備勢難再調轉瞬吉林黑龍江兵丁
過境皆須馬匹並應預備乘騎剿賊爲數更多
仰懇

飭發察哈爾等處牧廠孳生馬二千匹挑選膘壯口
輕者蓋用烙印分赴解直應用再索倫兵過境

尤須加意彈壓省中實無幹員可委並懇

欽差大員前赴良鄉至順德一帶督同委員州縣約

束更爲嚴整均奏入

上命軍機大臣傳諭那彥成曰豫東二省賊匪連日
雖據高杞同興奏報俱有殲獲但賊勢尙衆恐仍
未足深恃正在降旨飭令那彥成迅速行走前赴
軍營接印任事接據那彥成續奏之摺其所稱西
安駐防滿兵不能多挑一節昨已降旨令富僧德
帶領一千名先赴河北此時不可撤回其穆克登

布續備之一千名著卽停止那彥成請帶之甘肅
督標河州鎮標兵共一千名旣稱健勇可靠著卽
帶往又有提標兵五百名兵威已形壯盛所請巴
圖魯侍衛一二百員刻下京畿不甚安靜不能多
派慶祥富蘭格布舍等先後共已帶有二十餘員
軍營亦不患帶兵無人那彥成惟當遵照諭旨速
由潼關徑赴河北勉力除逆安良以副委任俟行

抵溫承惠軍營接受欽差大臣關防卽傳諭溫承
惠令其專辦此一路大兵糧餉其所請選帶之總
兵馬元特依順保等俱准其帶往

上又命軍機大臣傳諭同興曰此次東省官兵甫經
與賊接仗將定陶縣附近匪徒殲斃三百餘人生
擒八十餘名事機尙爲順利惟官兵殲擒之賊若
果係兇狡逆犯得就誅戮自足以挫賊鋒如祇係

裹脅老弱雖經剿殺於事無益而有害甚或官兵等貪功妄報將被難良民擅殺充數大乘除莠安良之意賊匪由東赴豫沿途並不焚劫傷人竟有收攬人心詭計倘官兵等濫及無辜則是驅良爲盜堅其從賊之心於全局大有關係該撫當嚴切曉諭帶兵將領認真剿賊勿蹈妄殺邀功之習自取罪戾此爲至要至該撫因賊衆現聚曹縣定陶

之閒令徐州鎮總兵沈洪移駐曹縣幫同剿捕所
辦甚是沈洪久厯戎行著該撫卽傳諭該鎮令其
帶兵與賊接仗該撫並督同東省官兵一同策應
將賊衆由東南向西北剿殺刻下溫承惠大兵在
西北進剿東省若將賊匪逼近一處則兩面夾攻
使賊首尾不能相顧定可一鼓殲除萬不可令賊
向東南兩面奔竄擾及完善之地致形滋蔓

上又命軍機大臣傳諭百齡曰豫東二省教匪滋事
江南安徽邊境在在毘連一切防堵事宜甚關緊
要頃據方受疇奏歸德府之商邱虞城北界與東
省曹單兩縣接壤現在賊匪屯聚曹縣西北扈家
集約有二千餘人此外股數分歧四處焚掠等語
百齡現赴徐州調兵防堵徐州之碭山與河南虞
城山東曹單逼近卽日大兵進剿曹單之賊一經

剿敗如向東南奔竄則商邱虞城在所必經刻下
睢汎漫口河身乾涸無險可據惟劉家口爲江皖
兩省通衢屏障豫省卽以保衛江南著該督相度
機宜選派鎮將帶兵駐劄劉家口地方將三省扼
要之區防禦緊嚴賊匪見前有重兵必不敢冒昧
奔突沈洪所帶之兵已進至山東界內直逼賊巢
劉家口駐紮之兵前可在後壯其聲援是爲一舉

兩得該督卽上緊籌備勿任賊匪稍有滋蔓

上又命軍機大臣傳諭高祀方受疇曰現在匪徒滋

事屯聚於豫省滑濟二縣及山東定陶單一帶

溫承惠帶領大兵已抵開州同興在曹州防堵豫

省現有高祀方受疇此時毋庸前赴河北軍

營河南省城緊要該撫卽馳赴省垣鎮靜彈壓料

理地方事宜督率沿河文武官弁扼要設卡實力

巡防無令賊匪偷渡現已降旨將睢汎漫口暫行
停工諭令藩司台斐音回省該撫督率該藩司等
將糧餉軍火及撫卹災黎等事悉心妥辦其帶兵
剿捕之事著專責成高杞辦理高杞連次得有勝
仗自應趁此銳氣迅掃賊氛不可因本任巡撫到
豫少存諉卽之見

上又命軍機大臣傳諭貢楚克扎布曰前經有旨令

貢楚克扎布在該處牧羣內挑馬三四千匹預備
吉林黑龍江馬隊官兵到京更換之用該都統自
已妥爲預備著再傳諭該都統此項馬匹不必全
行解京卽先挑選臘壯堪勝馳驟者二千匹烙具
火印派委委員卽日解赴保定交與章煦收明以
備吉林黑龍江官兵過直更換該都統再挑臘壯
馬二千匹徑解京城約計十一月間吉林黑龍江

官兵將次到京之前如數解到不可遲誤

上命軍機大臣傳諭盛京將軍和寧錦州副都統慶惠曰現已有旨調派吉林黑龍江兩處馬隊官兵二千名交德寧阿等四人分起管帶迅卽起程赴豫協剿該官兵等自騎馬匹長途疲乏至大凌河應須更換著和寧慶惠卽挑備膘壯二千匹在大凌河預備俟吉林黑龍江兩路官兵到時將疲乏

之馬照數更換其該官兵等原騎馬匹卽留於大
凌河牧廝喂養

是日

上諭內閣曰現因河南滑濬及山東曹州有逆匪滋
事特諭慶祥等分帶火器健銳二營官兵自京起
程赴溫承惠軍營協同剿捕原以除莠安良俾得
早靖賊氛撫綏黎庶該官兵沿途行走務當恪遵

軍紀秋毫無犯領兵大員尤當約束嚴明倘兵丁
有不遵紀律侵奪市販及互相爭鬪情事奏明責
革插箭示懲如竟有搶掠奸淫重情立卽正法儆
衆若該管官約束不嚴或縱容徇庇別經奏聞必
將帶兵之員從重治罪不稍寬貸

上命軍機大臣傳諭溫承志章煦高杞同興曰溫承
惠等調集直隸河南山東三省大兵分投剿辦其

江南陝甘各路官兵亦皆次第調發近日復又由
京簡派慶祥等帶同巴圖魯侍衛多人統率火器
健銳兩營官兵前往進剿尙有吉林黑龍江勁兵
啟程在途卽日數萬王師星馳雲集諒此烏合之
衆何難一鼓殲除此內爲首逆犯以及黨惡抗拒
之徒覆載不容自當一概誅夷不使一名漏網惟
念真正賊匪本屬無多其裹脅良民被其逼迫勉

強隨行若不爲區別全罹鋒刃大兵所到玉石俱
焚於朕心實有不忍今朕特施寬大之恩凡有被
賊裹脅入夥者如果悔罪投誠或聞官軍將至各
自散歸或臨陣不敢抗拒自行投出者其從前陷
賊之罪概置勿問官軍等不得妄戮一人地方官
亦不得妄拏追問若伊等能殺賊自効將首逆及
著名賊目或生擒來獻或割取首級投赴大營一

經驗明屬實則不但赦其已往之罪並當奏聞加以恩賞伊等具有天良轉禍爲福惟其自擇切勿迷而不悟久陷賊巢此朕保全良善之苦心若聞此諄諄誥誠猶不知改悔則是冥頑不靈自取誅夷罪在不赦以上諭旨著溫承惠高杞同興等均卽速瞻黃於所在地方遍爲張掛曉示官軍接仗之時亦明白宣諭使賊黨聞風解散彼此離心而

真正賊目亦必自相猜疑其勢日孤剿捕更易爲力再現在慶祥等分起帶兵由京起身隨後尚有吉林黑龍江兩處官兵次第進發此項官兵俱令直抵軍營剿辦賊匪沿途秋毫無犯本日已嚴降諭旨飭令慶祥等約束嚴明設有兵丁在徒滋事者按軍法懲辦章煦當巡飭沿途州縣曉諭村鎮百姓各安生業不可因大兵過境妄涉驚疑所慮

地方多事之徒或有倡造訛言恐嚇百姓致令畏懼流徒者並著該地方官嚴行查察如有此等奸徒懲辦一二以儆其餘則人心自靖矣

臣等謹按師出以律故過師衽席之上救民

水火之中市不易塵民皆安堵方無讐於除暴安良之義焉此次官兵圍剿滑城征調不下數萬京營勁旅及吉林黑龍江兩路官兵

尤稱驍勇若非約束堅明嚴其節制則師行千里豈能無犯秋毫我

皇上於慶祥等帶兵起程時

訓誠丁寧

特頒條約又恐大兵過境呂民易致驚疑復

諭令章煦於沿途州縣村莊遍爲出示安撫其有倡

造訛言者懲辦如律其後該官兵凱旋時間

有攜帶子女之事

諭令查辦不稍寬假蓋安民和衆必本於禁暴戢兵
膺慮淵深洵足靖人心而肅軍紀也

上又命軍機大臣傳諭載均元廣厚曰昨因睢州工
次與河北賊匪滋事地方相距不遠諭令將漫口
工程從緩辦理不必多集人夫尅期進占以昭慎
重茲朕再四熟思該處與賊氛甚近設所募人夫

中潛匿賊匪或有乘間劫掠焚燒之事所開匪細
看來現在工程竟以停辦爲是著戴均元等督率
在工員弁將已做裏頭鑲護穩固毋任復有塌卸
其應備料物暫停採辦如已採運到工妥爲安置
或派撥兵役嚴加防守勿稍疎虞所撥工需銀兩
陸續解到俱令實貯開列藩庫毋庸存留工次致
有疎失台斐音卽回省幫同方受疇料理軍需彈

壓地方

是日江南提督烏爾鄉額奏言

臣欽奉

諭旨派赴徐州邊界防守並卽選派將弁挑兵一千

名於九月二十四日自松江帶領起程馳赴徐

州駐紮防堵奏入報

聞